



*Rabu, 24 Januari 2024*  
**Ogen: Efesus 5:14b-17**



**Pergunaken Kesempatan Si Lit**



Lau e me sada sumber daya alam si genduari enggo ersibar. Lang nai ikataken maka lau ras matawari e me SDA si la erkeri-kerin. Perubahen cara geluh manusia, arah cara geluh alami kubas cara geluh industrialis, bagepe pencemaran ras penebangen hutan ngubahsa kerina. Mbue sumber lau si lanai terpake, dingen mata lau pe melala nggo nimpet. Ibas masa 20 tahun enda, sindube iakap la banci kerin, gundari enggo ersibar. La kepe ndekah rehna perubahen e.

Nginget si e, pedah Rasul Paulus nandangi perpulungen singgo ngaloken Jesus. Ise si enggo mate bas dosa nggo keke guna kegeluhen si mbaru. Sada persinget arah nden-nden si semal iendekan bas perpulungen, ipake rasul, *medakkenlah o kam si tunduh janah kekekenlah i bas si mate nari!* Sebab geluhta nggo itebusi. Erkiteken si e buktina kerna kita nggo itebusi Tuhan e arus sidadhken arah lagu langkahta sitep-tep wari. Sebab *"puncak dari ibadah kita adalah apa yang kita lakukan setiap hari yang memberi manfaat dan kepujian bagi Tuhan"*. Geluh sienggo itebusi Tuhan eme geluh si makeken kepentaren. Megermet nandangi kesempatan. Ngidah tep-tep peluang guna ncidahken kuasa ras kiniulin Tuhan. Tep-tep wari eme kesempatan. Tantangan geluh, keuntungan usaha, penampat teman, waktu luang si melala, teman si kesusahen banci kerina jadi kesempatan man banta guna meritaken Kata Dibata. Meritaken kerna Tuhan si tetap nampati kita ndarat arah kesusahen dingen si masu-masu kita ibas kerina sinidahken asal tetap kita ernalem man bana. Bagi lau si maler, launa lanai pernah mentas dua kali i bas ingan si seri. Bagepe kesempatan geluh enda, ula sia-siaken. Adi nggeluh denga kita senda, beritakenlah kuasa dingen kiniulinNa. Bagi lagu si mekattep si begi ras si endeken "o Tuhan pakailah hidupku selagi aku masi kuat" dalankenlah e.

✎ *Kesempatan la reh dua kali, pakekenlah.*